

Sesosa sa Khaohano



SABATHA MANTSIBOEA

Bakeng sa Boithuto ba Beke Ena Bala:

Deut. 28:1–14, Jer. 3:14–18, Baahl. 17:6, 1 Marena 12:1–16, 1 Ba-Kor. 1:10–17, Liketso 20:25–31.

Teman'a Khopolo:

“ ‘Qalo ea bohlale ke ho tšaba Jehova; ho tseba Ea halalelang ke hlalefo’ ”(Li-Proverbia 9:10).

Baporofoeta ba Testamente ea Khale ba ne ba atisa ho biletsa sechaba sa Israele ho latela litaelo tsa Molimo ka makhetlo-khetlo. Ho hloka kutlo le bohlasoa li ne li tla lebisa bokoenehing le khaohanong. Molao oa Molimo o ne o reretsoe ho ba tsela ea ho boloka batho litlamoraong tsa sebe tsa tlhaho le ho ba halaletsa har'a lichaba tse ngata tsa Balichaba. Ho latela molao oa Molimo ho ne ho tla tlisa kutloano har'a sechaba ho tiise botsitso ba sechaba hore se tsebe ho ema khahlanong le likhoro tsa borapeli ba bohedene le ba bokhopo bo neng bo ba teetse hare ka nqa tsohle. Morero oa Molimo e ne e le hore sechaba sa Hae se halalele 'me e be lipaki ho lichaba tse ba potileng. Joalokaha Jehova a ile a ba bolella kamor'a ho lopolla ba-Heberu Egepeta: “ ‘Bonang, ke le rutile melao le litaelo, kamoo Jehova, Molimo oa ka, a ntaetseng kateng, hore le tle le etse ka tsona lefatšeng leo a le neang ho le rua. Li bolokeng, le etse ka tsona; hobane ke tsona tsee e tla ba bohlale ba lona, le lekello ea lona pel'a lichaba tse tla utloa melao ena kaofela; li tla re: Chaba seno se seholo, ruri ke sechaba se hlalefileng, se nang le kelello ’” (Deut. 4:5, 6, NKJV). Ha ho potso: haeba ba ne ba ka lula ba tšepahetse, batho ba Hae [Molimo] ba ne ba tla hlohonolofala haholo 'me ba ne ba tlo fetohela ba bang lehlonolo. Ho hloka botšepahi, leha ho le joalo, ho ne ho tla tlisa letoto la mathata, khaohano e le bo le bong feela ba a mangata.

**Ithute thuto ea beke ena ho lokisetsa Sabatha sa la 13 Mphalane.*

“Khutlang, Bana ba Lahlehileng”

Nalane ea sechaba sa Israele e tletse ho hloka kutlo le ho hloka taolo, ho lateloang ke ho khutlela ho Molimo le kutlo, e be ho latela hape ho hloka kutlo ho fetang le likhohlano tse fetang. Tsela ena ea boitšoarō e ipheta joalo joalo. Nako le nako ha batho ba Molimo ba latela thato ea Hae ka ho tōpa, ba ne ba hlhohonolofatsoa ka khotsō le bophelo. Nako le nako ha ba hloka kutlo 'me ba latela litsela tseo e leng tsa bona, maphelo a bona a ne a ba bosula, a tla ka lintoa le likhohlano. Le pele Israele e kena Lefatšeng la Pallo, Molimo o n' a sa ntsa boletse tsela ena ea boitšoarō esale pele 'me a ba file le tharollo ea ho qoba litlamorao tse mpe ha kalo bophelong ba bona.

Bala Deuteronomā 28:1–14. Israele e ne e tla fumana litlhohonolofatso life haeba batho ba ne ba latela thato ea Molimo?

Bala Jeremia 3:14–18. Re ithutang pitsong ea Molimo ho Isreale hore e bake 'me e khutlele ho Eena? E re bolella eng ka lerato la Molimo le mamello ea Hae ho batho ba Hae?

Se makatsang bukeng ea Jeremia ke kamoo Molimo a bonoang a le lerato, mohau le ho fana kateng ho sechaba sa Hae ho sa natse bokoenehi, likarohano, le borapeli ba bona ba litšoantšō. Molimo o lutse a memela sechaba sa Hae ho khutlela ho Eena 'me se bake liketsong tsa sona tsa bokhelohi. Khafetsa le khafetsa Molimo o ne a tšepisa pusetso le tšepo bakeng sa bokamoso. “ “Khutla, Israele mokoenehi, ho bolela Jehova, nke ke ka u sosobanyetsa sefahleho, hobane 'na ke mohau, ho bolela Jehova, ke ka 'na ka lesa lisuoa kamehla. Feela u ipolele bokhopo ba hao, hobane u koenehetse Jehova, Molimo oa hao, u 'nile oa mathela ka nqa tsohle ho melimo ea lichaba, ka tlas'a lifate tsohle tse mahlaku; le mpa le sa ka la mamela lentsoe la ka, ho bolela Jehova' ” (Jer. 3:12, 13). Mantsoe a Jeremia a ne a buoa nakong eo ka kakaretso batho ba lesitseng Lentsoe la Molimo. Leha ho na le linchafatso tse ileng tsa etsoa nakong ea Morena Josiase, batho ba bangata ba ne ba sa utloē tšusumetso ea ho tsoela pele ba tšepahala ho Molimo. Libe tsa bona, borapeli ba bona ba litšoantšō, le maphelo a bona a tletseng boichebo li ne li baka tšenyō ea semoea le ea lipolotiki. Ha ba ntse ba tsoela pele ho tloha thatong ea Molimo, bokamoso ba bona bo ne bo mpefala ho feta. Feela, Molimo oa bua le bona, ka Jeremia. Molimo o ne a e-na le mohopolo oa bokamoso bo chabileng bakeng sa bona, 'me o ne a laba-labela ho ba khutlisetsa naleng, bonngoeng, le bophelong bo botle. Empa tsena li ne li tla tla ha feela ba ne ba ka phela ka tumelo le sohle se kenellang tumelong ea 'nete.

Uena kutlo le ho hloka kutlo ho tlišitse'ng bophelong ba hau?

A Lokile Mahlong a Hae ka Bo-Eena

Lipale tse tsoang bukeng ea Baahloli li bontša litlamorao tse ngata tse bosula tsa Israele ha e sa latele thato ea Jehova. Hang kamor’a hore Israele e kene Kanana, batho ba qalella ho bapisa maphelo a bona a semoea le a Ba-Kanana ba neng ba ba potile—hantle eona ntho eo ho neng ho itsoe ba se ke ba e etsa! Ka bomalimabe, ha e ea ba bona feela bothata boo ba neng ba tobane le bona.

Bala Baahloli 17:6 le Baahloli 21:25. Litemana tsee li ruta eng ka mathata a mang a mangata a ileng a hlaha har’a sechaba sa Molimo?

Hoo hee ke rasepe ea likarohano le likhaohano har’a sechaba sa Molimo. Bonngoe ba sechaba bo ne bo tla fumanoa ka kutlo le botšepahi ba bona ho Morena oa selekane, selekane seo ba neng ba kene ho sona le Molimo. Ka ho etsa, leha ho le joalo, se lokileng mahlong a bona—haholo ha ba ne ba susumetsoa ke lichaba tse ba potileng—ba ne ba tšoare tsela e isang tlokotsing. Kaofela re libopuo tse oeleng, ‘me ha re lesitsoe ho etsa kamoo re ratang kateng, re lesitsoe ho latela tšekamelo tsa lipelo tsa rona, re tla kheloha tseleng eo Molimo a re bilelitseng ho tsamaea ho eona.

Litemana tse latelang li re bolella eng ka boemo ba Israele ba semoea le boitšoarō nakong ea baahloli?

Baahl. 2:11–13 _____

Baahl. 3:5–7 _____

“Molimo ka Moshe o ne a beile kapele ho sechaba litholoana tsa ho hloka botšepahi. Ka ho hana ho boloka selekane sa Hae, ba ne ba tla ikhaola bophelong ba Molimo, ’me tlhohonolofatso ea Hae e ne e tla sitoa ho ba fihlela. Ka nako tse ling litlhokomeliso tsena li ne li mameloa, ’me mahlohonolo a mangata a anele sechaba sa ba-Juda e be ka bona a anela batho ba ba pota-potileng. Empa hangata ho feta hanyane, nalaneng ea bona ba ne ba lebala Molimo ’me ba lahleheloe ke pono ea monyetla oa bona o phahameng oa ho ba baemeli ba Hae. Ba ne ba mo hlokisa tšebeletso eo a e batlileng ho bona, ’me ba hlokisa le batho ba habo bona tataiso ea semoea le mohlala o halalelang. Ba ile ba lakatsa ho ikhapela litholoana tsa tšimo ea morara eo ba neng ba beiloe liqhoku tsa eona. Lerato la bona la leruo le meharo tsa etsa hore ba hlouoe le ke bahedene. Ka mokhoa o joalo, lefatše la bahedene la neoa monyetla oa ho hlalosa semelo sa Molimo le melao ea ’muso oa Hae hampe.”—Ellen G. White, *Prophets and Kings*, maq. 20, 21.

Karohano ea Sechaba sa ba-Heberu

Tsela ea bokoenehi, le litlamorao tsa eona tse bosula, ha e ea etsahala ka tsatsi le le leng. Empa likhetho le liqeto tse fosahetseng tseo esaleng li bokelloa ka makholo a lilemo li ile tsa qetella li tliselitse sechaba litlamorao tse tšabehang.

Bala pale ea Morena Rehoboame ho 1 Marena 12:1–16. Ke eng e bakileng karohano e tšabehang har’a sechaba sa Molimo?

“Hoja Rehoboame le baeletsi ba hae ba se nang maiphihlelo ba ne ba utloisisa thato ea Molimo ka Israele, ba ka be ba ile ba mamela kopo ea sechaba ea ho nchafatsa tšebetso ea boetapele pusong. Empa horeng ea monyetla e ileng ea ba fihlela kopanong ea bona Sikeme, ba hloleha ho nahana ka liketso le litlamorao tsa tsona, ’me ka mokhoa o joalo ba fokolisa tšusumetso ea bona holim’a palo e ngata ea batho ka ho sa feleng. Polelo ea bona ea maikemisetsa a ho ntšetsa pele le ho eketsa khatello e bileng teng nakong ea puso ea Solomone ka tsela e khahlanong le leano la Molimo ka Israele, ’me ba fa sechaba lebaka le hlakileng la ho se tšepe merero ea bona. Tekong ena ea ho sebelisa matla e hlokaeng bohlale le kutloelo, morena le baeletsi ba hae ba bontša boikhothomoso ba matla le borena.”—Ellen G. White, *Prophets and Kings*, leq. 90.

Litemana tse latelang li re’ng ka bohlokoa ba bohlale bakeng sa ho etsa liqeto tse nepahetseng? Mohloli oa bohlale ba ’nete o hokae?

Li-Prov. 4:1–9 _____

Li-Prov. 9:10 _____

Jakobo 1:5 _____

Pale ea Rehoboame le qeto ea hae e potlakileng e boeatla ea ho sebelisa batho ka thata e bile ketsahalo e bosula bophelong ba ’muso oa Israele. Morena o ile a batla keletso ho lihlopha tse peli tsa baeletsi, empa qeto ea ho qetela ea ho latela keletso ea bahlankana ba banyane ba lilemong tsa hae e ile ea tlisa tlokotsi ’musong oo ntat’ae Solomone le ntat’ae moholo Davida ba o ahileng ka lilemo tse 80 pele ho moo. Keletso ea hore morena a tšose letšoele ka ho phatlalatsa hore o tiile ho feta ntat’ae e ne e le keletso ea boeatla. Baeletsi ba banyane ba ne ba lumela hore ho utloela sechaba bohloko ka kopo ea bona ea ho ba fokoletsa boima ba mosebetsi e ne e se mofuta oa boetapele oo morena a lokelang ho sebetsa ka oona. Ba re, o lokela ho itlhabisa a le khopo a le pelo e thata. Qetellong, o itlhabisitse e le mpoli e sa lokeloeng ke bolateli le botšepahi ba sechaba sa hae. Kahona, ha e-ba le karohano har’a sechaba sa Molimo e neng e sa lokela ho ba teng ’me seo e ne e se morero oa Molimo ka sechaba sa Hae.

Karohano Korinthe

Ka bomalimabe, taba ea khaohano har'a sechaba sa Molimo ha e ea ka ea fela le nakong ea Testamente e Ncha. Mohlala, likhaolo tse 'ne tsa pele tsa Lengolo la Pele la Pauluse ho Ba-Korinthe ke boipiletso bakeng sa bonngoe. Pauluse ha a le Efese a utloela hore ho na le likarohano tse hlahleng kerekeng ea Korinthe. Ka mokhoa o joalo, o qala lengolo la hae ka molaetsa o mo lelele o sebetsanang le taba ea bonngoe kahare ho kereke le tlhokeho ea ho qoba likarohano. Pauluse o tsoenyehile ke khatelo pele ena, 'me o leka ho fana ka keletso e susumelitsoeng ho leka ho phekola boemo bona bo malimabe.

Ho latea 1 Ba-Korinthe 1:10–17, ke eng e neng e bonahala e bile sesosa sa likhaohano, sa likarohano tsa bona le likhang?

Pauluse o ile a tsoenyeha ka baena le likhaiseli tsa hae tse Korinthe ha motho e mong ho tsoa sechabeng sa Chloe a mo bolella ka likarohano le likhang tse har'a bona. Mantsoe a hae a qalang a bontša botebo ba ho tsoenyeha ha hae: “Kea le rapela bana beso, ka lebitso la Morena oa rona Jesu Kreste, ke re: le ke le bolele bohle taba e le 'ngoe, likhaohano li se ke tsa e-ba teng har'a lona.” Tharollo ea hae e ne e le ho ba hopotsa hore, joaloka Bakreste ba lokela ho kopana hammoho “boikutlong bo le bong le khopolong e le 'ngoe” (1 Ba-Kor. 1:10). Eng kapa eng e neng e baka likhang le likarohano, Pauluse o n'a batla e emise. Pauluse o hopotsa Ba-Korinthe hore Bakreste ba bilelitsoe ho latela Kreste, e seng motho—ho sa natse hore na motho ea joalo o na le litalenta kapa o fuoe ha kae. Ha ho ne ho bonahala ba ikarotse ka meeli ea “mekha,” moapostola a bontša ntle ho tika-tiko hore likhaohano tse joalo ha se thato ea Kreste. A tiisa hore bonngoe ba Bokreste bo theuoe ho Kreste le sehlabelo sa Hae sefapanong (1 Ba-Kor. 1:13).

Bonngoe ba Bokreste bo fumana mohloli oa bona 'neteng, joalokaha e fumanoa ho Jesu Kreste ea thakhisitsoeng, e seng ho e mong, ho sa natse hore na motataisi kapa moreri kapa moetapele o “loketsoe” ha kae. Maotong a sefapano bohle re maemong a lekanang. Re kolobelletsoa ho Jesu, e leng Eena feela ea ka re hlatsoang sebe. Leha ho le joalo, re lokela ho sebeletsa bonngoe bona bo ho Kreste ka litsela tse phelehang. Seo taba ena e lokelang ho re bolella sona re le Baleti ba Letsatsi la Bosupa ke hore, ha rea lokela ho nkela bonngoe ba rona ba tumelo le thomo tlase. Likhaohano le likhang li ka fokolisa bonngoe ba kereke ntle le hore lerato le borena ba Kreste bo re kopanye ho Eena.

Re ka qoba mefuta ea likotsi tseo Paulose a n'a sebetsana le tsona moo joang? Ke hobaneng ha re lokela ho lula re le seli hore botšepahi ba rona re fana ka bona ha kae ho motho e mong osele ho e-na le Kreste?

“Ho Tla Kena Liphiri”

Bala Liketso 20:25–31. Pauluse o ne a hlokomelisa baholo ba ba-Efese ka’ng? ba ne ba lokela ho etsa eng ho thibela see hore se se etsahale?

Pauluse o ne a atisa ho khahlana le khanyetso bosebeletsing ba hae, ’me o ne a tseba hore ho tla ba thata ho boloka bohloeki ba evangeli ea Jesu Kreste. Mants'oeng a hae a ho qetela ho baholo ba ba-Efese o ile a qotsa papisong ea molebeli e ho Ezekiele 33:1–6 ho bolella baetapele ’moho le eena hore ba boetse ba na le boikarabello ba ho sireletsa evangeli. Ba ne ba lokela ho ba balisa ba tšepelang ba liphutheho tsa bona. Tšebeliso ea Pauluse ea poleloana “liphiri tse bohale” ho hlalosa baruti ba bohata (Liketso 20:29) e hopotsa tlhokomeliso e tšoanang ea Jesu hore baruti ba bohata ba tla iphaphanya ba apere makoko a nku (Matt. 7:15). Hang kamor’a hore Pauluse a bue thokomeliso ena baruti ba bohata ba ile ba feela ba hlaha, ’me ba ile ba harolaka balumeli likerekeng tsa Asia tseo a neng a li theile. Ho Ba-Efese 5:6–14 le Ba-Kolose 2:8, re bona tse ling tsa lithokomeliso tsa Pauluse ho likereke tse Asia Minor. Lengolong la bobeli ho Timothea, Pauluse o boela a hlokomelisa Pauluse, ea neng a jere boikarabello ba kereke e Efese, khahlanong le lithetso tse ka kerekeng le ho se tšabe Molimo ha matsatsi a bofelo.

Bala 2 Timothea 2:14–19 le 3:12–17. Pauluse o re’ng ho Timothea mabapi le kamoo a ka thibelang baruti ba bohata ’me a boloka bonngoe ka kerekeng?

Taba ea pele, Timothea o lokela ho tseba Bible, “[e be ea] rutang lentsoe la ’nete ka ho loka” (2 Tim. 2:15). Sehlare sa likhang le maiqapelo-taba ana ke ho utloisisa hantle le ho ruta lentsoe le o re le neiloeng ke Molimo. Linnete tsa Bible li lokela ho tolokoa hantle e le hore ho se be karolo ea Mangolo e beoang khahlanong le bophara ba setšoantšo seo Bible e re fang sona, le ho thibela botoloki bo fosahetsng bo ka bakelang e mong ho lahlehloa ke tumelo ho Jesu. Litaba tse sa ameheng le tse seng tsa mantlha li beoe katlas’a litaelo tsa Lentsoe la Molimo tse tla lokisetsang balumeli ho phela e le bahloli ho Kreste. Khothaletso ea bobeli ea Pauluse ho Timothea ke hore a “hane mesoaso ea lipolelo tsa lefeela” (2 Tim. 2:16). Litaba tse fokolang le tsa maiqapelo ha lia lokela ho ba karolo ea lithuto tsa Timothea haeba a lokela ho nkuoa e le moruti ea tšepelang. Mefuta e joalo ea lipuisano e eketsa ho tlisa ho se tšabe Molimo ’me ha e ahise tumelo ea balumeli (2 Tim. 2:16). Ke ’nete feela e tlišang ho tšaba Molimo le kutloano hara balumeli. Lebaka leo ka lona Timothea a lokelang ho qoba le ho khothaletsa batho ba hae ho qoba lithetso tse joalo ke hobane li fiela kereke joalo ka seoa (2 Tim. 2:17). Qetellong, ho latela Lentsoe la Molimo ke hona feela sehlare sa lithuto tse khelohileng (2 Tim. 3:14–17) tse hlaselang bonngoe ba kereke.

Ho Ithuta Haholoanyane:

Ellen G. White, “The Rending of the Kingdom,” maq. 87–98, ho *Prophets and Kings*; “A Message of Warning and Entreaty,” maq. 298–308, ho *The Liketso of the Apostles*. “Morena o lakatsa ha bahlanka ba Hae ba ka ithuta ho kopana hammoho boikitlaetsong bo tsamaellanang. Ho ka ’na ha bonahala mahlong a bona e ka lineo tsa bona le lineo tsa basebetsi ’moho; empa ha ba hopola hore ho na le likelello tse fapaneng tse lokelang ho fihleloa, le hore ba bang ba ka hana ’nete e fanoang ke mosebetsi e mong, e be ba bulela ’nete ea Molimo lipelo tsa bona ha e fanoa ka tsela e fapaneng ke mosebetsi e mong osele, tšepo ke hore ba tla leka ho sebetsa hammoho ka bonngoe. Ho sa natse hore na litalenta tsa bona li fapane ha kae, li ka tlasa taolo ea Moea o le mong. Lentsoeng le ketsong e ’ngoe le e ’ngoe, ho tla bonahatsoa mosa le lerato; ’me etlare ha mosebetsi ka mong a ema sebakeng sa hae seo a se khethetsoeng ka botšepahi, thapelo ea Krete bakeng sa bonngoe ba balateli ba Hae e tla arabeloa, ’me lefatše le tla tseba hore bana ke barutuo ba Hae.”—Ellen G. White, *Gospel Workers*, leq. 483.

Lipotso tsa Puisano:

1. Taba ea ho etsa se lokileng “mahlong a motho” ha se ntho e ncha. Maikuto a sejoale-joale a qholotsang maikutlo a fe kapa a fe a matla a khubung a akaretsang a kelello kapa a boitšoaro, a na le bokhoni ba ho betla tsela ea maitšoaro a sa laoleheng ao Bible e hlokomelising ka oona. Re le Bakreste, kapa re le kereke ka botlalo, re ka toba qholotso ea mofuta oo joang?
2. Nahana ka pale ea Morena Rehoboame le karohano ea Israele (1 Marena 12). Ke lithuto life tse teng moo bakeng sa rona kajeno?
3. Baetapele le litho tsa kereke ba ka etsa eng ho thibela mefere-fere le maquoloana kerekeng ea lehae ha a hlaha? Ho bohlokoa ha kae ho thibela litaba tsee pele li hola ’me li baka khopiso? Re le litho tsa kereke re ka etsa joang ho qoba ho oela lerabeng le tšoanang le la ba bang Korinthe?
4. Ithute moelelo oa litemana tse buang ka likhohlano ho Liproverbia 6:16–19. U ithuta eng moo e ka thibelang likhohlano kerekeng ea haeno?

Kakaretso: Ka Bibeleng re fumana maemo a bakileng likhaohano. Ha sechaba sa Molimo se ne se phela ka botšepahi le kutlo, kotsi tsa likhaohano li ne li fokotseha haholo. Mehlala ea nakong ea Baahloli le ho tloha nakong ea Rehoboame e ile ea bula likhoro tsa likarohano. Le nakong ea Testamente e Ncha, khonahalo ea likhaohano e ne e ntse e le teng. Kutloisiso e nepahetseng ea Lentsoe la Molimo le maleke a halalelitsoeng a ho le latela ke eona tšireletso e tsoang pele khahlanong le likhaohano le mefere-fere har’a rona.